

## 痰飲第一

《嬰童寶鑑》小兒痰飲候歌：

飲水並傷乳，為痰結在胸。令兒不下乳，吐沫與癩同。實即身多熱，謔言入睡中。早須醫治取，久即變驚風。

《外台》：范汪 病痰飲者，當以溫藥和之。療心腹虛冷，游痰氣上，胸肋滿，不下食，嘔逆，胸中冷。  
半夏湯方

半夏（一升，洗）生薑（一斤）橘皮（四兩）

上三味切，以水一斗煮取三升，分三服。若心中急及心痛，肉桂心四兩。若腹痛，內當歸四兩。羸瘦、老小者服之佳。忌羊肉、錫。兒小分減服。

《王氏手集》倍朮丸 治脾胃受濕，心下停飲，煩渴嘔吐，腸間漉漉有聲，胸膈痞滿，短氣，腹脅脹痛，小便不利，身面虛浮，全不思食方。

官桂 乾薑（各一兩）白朮（二兩）

上為末，煉蜜為丸綠豆大。每服十五、二十丸，米飲下。兒小減丸。

《王氏手集》丁香開胃丸 治脾胃不調，停積痰飲，嘔吐吞酸，胸膈痞悶方。

半夏（為粗末，用生薑汁浸，炒令黃色）甘草（炙）京三棱（炮，各一兩）丁香（三分）乾木瓜（半兩）生薑（十二兩，切，研入青鹽一兩，炒潤，焙乾為末）

上為細末，煉蜜為丸雞頭大。每服一丸，沸湯化下，不計時候。兒小分減。

## 腫滿第二

《巢氏病源》小兒腫滿候：小兒腫滿者，由將養不調，腎脾二臟俱虛也。腎主水，其氣下通於陰。脾主土，候肌肉而克水。腎虛不能傳其水液，脾虛不能克製於水，故水氣流溢於皮膚，故令腫滿。其挾水腫者，即皮薄如熟李之狀也。若皮膚受風，風搏而氣致腫者，俱虛腫如吹，此風氣腫也。

茅先生：小兒生下有中氣腫候。遍身黃腫，腫滿，腹肚不和，氣喘急，此候因吃物不度，或因瀉久而虛至此。所治者，先用勻氣散、（方見胃氣不和門中）。醒脾散與調一日，（有二方：一方見胃氣不和門中，一方見慢脾風門中。）後下甘遂散，通下黃水五升已來，（方見本門）即用勻氣散夾醒脾散與服。五日後常下塌氣散、（方見本門）。仍要斷鹽醋一月日即愈。如見氣大喘，不吃食，陰腫唇縮，死候不治。

漢東王先生《家寶》論：小兒頭面、手腳浮腫，因疳積日久結風，此病或因久患用藥不退，發渴喜飲水，變成虛浮二証。宜先用調胃氣藥補之，如觀音散、（方見胃氣不和門中）。人參散（方見失食傷寒門中）

之類，自然平愈。如服調胃藥不退，宜進內消丸。又未退，進紅粉散取了，（二方並見本門）。再用藥補之。

錢氏論：腫病，腎熱傳於膀胱，膀胱熱盛逆於脾胃，脾胃虛而不能製腎，水反克土，脾隨水行。脾主四肢，故流走而身面皆腫也。若大喘者重也。何以然？腎大勝而克退脾土，上勝心火，心又勝肺，肺為心克，故喘。

或問曰：心刑肺，肺本見虛，今何喘實？曰：此有二，一者肺大喘，此五臟逆；二者腎水氣上行，滂浸於肺，故令大喘，此皆難治。

張煥論：小兒諸病後下痢不瘥，或有體腫滿。蓋脾腎虛弱，腎主水，其氣不通於陰；脾主土，候於肌肉而克水。脾腎俱虛，不能克製於水，故流溢皮膚，則令腫滿。

翰林待詔楊大鄴問：小兒四肢浮腫，喘嗽者為何？答曰：小兒寒熱虧盈本是常度。一食失節，百病來襲，何況過有熱壅諸毒，是積小成多，壅塞遍於胃管，日月深遠，積結轉深。雜食未離於口，三焦之氣不通，四肢漸漸浮腫，小便或即赤黃，大便或通或秘，致喘促，盈盈虛脹，每每從茲食減轉至羸，先要安和脾胃，次須利小腸，免傷枉矣。

《嬰童寶鑑》小兒氣腫水腫候歌：

小兒腫滿一如吹，只為風邪與氣為。若見皮膚熟李樣，此名疔水定無疑。脾虛土壤難禁水，腫滿從來只在皮。腫若赤時因熱作，皆由氣血各無歸。但見此般須早辨，莫令差失致傾危。

《外台》：劉氏療小兒身體滿，氣急，臥不得方。

上用郁李仁一合搗末，和面搜作餅子，法與兒吃，微利即瘥。

《外台》劉氏又方

上用郁李仁末六分，以水七合和調，去滓，煮粥與兒吃之。

茅先生小兒氣腫、水腫甘遂散方

甘遂 大戟 黑牽牛 檳榔 陳橘皮(去白) 木香(以上各半兩)

上為末。每歲一錢，五更初用蔥酒調下。不食吃酒、用蔥湯調下。天明通下黃水來，可依形証調理。

茅先生小兒腫後塌氣散方

中庸 赤小豆 橘皮紅 蘿卜子 檳榔 甘草(以上各半兩) 木香(一分)

上為末。每服二錢，水一小盞，薑棗同煎至六分。通口服，進四服，看大小用。

《嬰孺》治小兒面目腫，胸膈中有熱方。

黃芩 芍藥 知母(各四分) 虻蟲(三十個，炒) 當歸 大黃 甘草(炙。各三分)

上為末，蜜丸大豆大。飲下，二丸，日四夜一。若睡中涎膈上有水者，加細辛、白朮各三分，令兒強健。

《嬰孺》治小兒通體洪腫，腹滿堅脹，氣喘急。**郁李仁湯方**

郁李仁(三合) 大黃(十二分) 柴胡 澤瀉(各八分) 赤茯苓(十分) 黃芩 麻黃(各十二分) 杏仁(湯去皮尖) 升麻(各七分) 芍藥 豬苓(各八分) 鱉甲(五分，炙)  
上以水二升半煮一升六合。七歲為三服，四、五歲為四服，隨小大加減。

《嬰孺》治小兒腫滿**黃芩湯方**

黃芩 澤瀉 通草(各八分) 柴胡 桑白皮(各七分) 杏仁(湯去皮尖) 豬苓(去皮柴。各六分) 澤漆葉(四分)  
上以水五升煮一升半，四、五歲兒為三服。一、二歲服二合。

《嬰孺》治小兒腫滿**小豆飲子方**

槲皮白(切，七合) 茯苓(二分) 小豆(八分)  
上以七升水煮一升四合，去滓飲之，未效再合。

《嬰孺》治小兒腫滿不消，服湯不退。**葶藶煎方**

葶藶子(三分，炒) 防己(六分) 柴胡(八分) 茯苓 澤瀉 杏仁(去皮尖，炒，研。各十二分) 澤漆葉(炒) 郁李仁(各五分) 蜜(一升)  
上以水一斗，煮二升半，去滓，內杏、蜜煎至二升。二歲兒一合。量大小服之。

《嬰孺》治小兒腫滿結實，諸治不效。**甘遂丸方**

甘遂(炒) 芍藥 杏仁 車前子 黃芩 豬苓 葶藶子(炒。各三分) 鱉甲(七分，醋炙)  
上為末，蜜為丸大豆大。竹葉飲下，二歲五、六丸。日再量之。

《嬰孺》治小兒腫滿，頭面、身體壯熱似傷寒者方。癰瘰腫者，除大青用。

龍膽 葵子 葳蕤 大青 茯苓 前胡(各一分)  
上以水二升，煮八合，服半合，日再。

《嬰孺》治小兒頭面及身體浮腫。**衛矛丸方**

衛矛羽(鬼箭用羽也，鬼箭一名衛矛) 松羅(四分) 防己 黃(各三分) 郁李仁(一錢，別研入)  
上為末，蜜丸大豆大。百日兒食後一丸。日再，以腰中身體汗出盡為度。

《嬰孺》治少小手足、身體腫方。

鹹菹汁

上溫浸之，汁味盡，易為度。

《嬰孺》又方

上溫人溺，令暖漬之。

漢東王先生《家寶》治小兒頭面、手腳虛浮。內消丸方

青橘(五個, 湯浸去瓢) 巴豆(七個, 去殼) 木香(二錢, 炮) 防己(一錢半) 丁香(十四粒)  
上青橘同巴豆炒蒼色, 去巴豆不用, 以其餘藥為末, 蒸餅丸如大麻子大。每服二、三歲三丸, 四、五歲七丸或十丸。男孩兒陳橘皮湯下, 女孩兒煎艾葉湯下。一日三服。

漢東王先生《家寶》治小兒渾身虛腫, 氣喘, 不思飲食。紅粉散方

朱砂(一分) 檳榔(一錢) 輕粉(半錢)  
上為末, 每服一字及半錢, 薄荷湯調下。吃一服則取下, 仍用觀音散、(方見胃氣不和門中)。人參散(方見夾食傷寒門中)調其胃氣。忌生冷、粗硬等物。

張渙 海蛤湯方 治腫滿, 大小便不利。

海蛤 桑根白皮(各一兩) 漢防己 白朮(炮) 赤茯苓(各半兩) 甜葶藶(隔紙炒紫色) 川朴硝 木豬苓(去黑皮, 各一分)  
上件搗, 羅為細末。每服一錢, 水一盞煎至五分, 去滓溫服, 乳食後。

張渙 郁李仁丹方 應腫滿, 皆可服。

郁李仁(湯浸去皮, 微炒) 檳榔(各半兩) 牽牛子(一分, 炒)  
上件搗, 羅為細末, 滴水和丸黍米大。每十粒煎蔥白湯下, 不拘時候。量兒大小加減。

《惠眼觀証》塌氣散大治虛腫脹滿, 虛煩, 手足腫, 宜服此方。

白朮 木香 青橘皮(去瓢) 甘草(炙) 茴香(各半兩) 巴豆(三十粒)  
上將巴豆炒橘皮, 候巴豆黑色, 去巴豆, 取橘皮, 用諸藥為末。每服一大錢, 飯飲調下。

《吉氏家傳》治小兒遍身腫塌氣散方

漢防己 當歸 芍藥 紫菀 黑牽牛 杏仁(去皮略炒, 先研。以上各一錢) 檳榔(面, 二錢) 綿黃(二錢, 蜜炙)  
上件為末。每服一錢, 水一盞, 薑三片, 棗子一個, 煎至五分服。

《吉氏家傳》治小兒遍身虛腫棗肉丸方

石燕子(一個, 捶為末) 大棗(七個, 去核) 巴豆(七粒, 去油)  
上二味入棗肉內, 燒存性, 細研, 以蟾酥丸麻子大。看原因甚物所傷, 以原傷物汁下, 甚妙。

《莊氏集》俞穴灸法：飲水不歇, 面目黃者, 灸陽綱各二壯。在第十椎下兩旁各五寸陷中。

### 水氣第三

《嬰童寶鑒》：小兒水氣, 是積聚久不治, 並頻下而脾胃虛, 積散而成水氣, 及通身虛腫, 但如熟李, 即是水也。有疝氣虛腫而不亮也。

《惠眼觀証》：水氣浮腫，遍體如黃熟李色不能消。先調氣，次日四更下中庸飲子，取下膜外浮水一兩盆(方見專門)，即調氣後用粥補一月，斷鹽醋一月外，又服調氣散(方未見)，須安樂。若此候見臍凸肚腫，兩腎如石，此死候不治。

《簡要濟眾》治小兒水氣腹腫，兼下痢膿血，小便澀方。

葶藶子(半兩，微炒，搗如面)

上以棗肉和搗為丸，如綠豆大。每服五丸，棗湯下，空心晚後。量兒大小加減服之。

《聖惠》治小兒水氣，腫滿喘促，坐臥不安，宜服檳榔散方

檳榔 川大黃(銼碎，炒) 牽牛子(微炒) 甜葶藶(隔紙炒令紫色。各半兩)

上件藥搗，細羅為散。每服以溫水調下半錢，日二、三服。兒稍大增之，以利為效。

《聖惠》治小兒水氣腫滿，喘嗽不止。赤茯苓散方

赤茯苓 桑根白皮(銼) 貝母(煨微黃。各半兩) 桔梗(去蘆頭) 甜葶藶(隔紙炒，令紫色) 川升麻 杏仁(湯浸去皮尖、雙仁，炒微黃。各一分)

上件藥搗，粗羅為散。每服一錢，以水一小盞，煎至五分，去滓溫服，日三、四服。更量兒大小加減服之。

《聖惠》治小兒水氣腫滿不消楮皮湯方

楮樹白皮(銼) 赤小豆(各一合) 赤茯苓(二兩，銼)

上件藥都和令勻。每取一分，以水一小盞，煎至五分，去滓，分為二服，日三、四服。隨兒大小以意加減。

《聖惠》治小兒水氣腫滿，小便澀。狸豆根湯方

狸豆根 桑根白皮 車前草(各半兩) 葵子 赤小豆(各半合)

上件藥細銼和勻。每取一分，以水一小盞，煎至五分，去滓，分為二服，日三、四服。隨兒大小以意加減。

《聖惠》治小兒水氣腫滿，小便不利，臍腹妨悶，喘促。豬苓散方

豬苓(去黑皮) 桑根白皮(銼) 赤茯苓 海蛤(細研) 甜葶藶(隔紙炒令紫色。各一分)

上件藥搗，粗羅為散。每服一錢，以水一小盞，煎至五分，去滓溫服，日三、四服。更隨兒大小以意加減。

《聖惠》治小兒水氣，遍身腫滿，喘促，小便不利。桑根白皮散方

桑根白皮(銼) 射乾 赤茯苓 黃芩 木通(銼) 澤漆 漢防己 澤瀉(各十兩)

上件藥搗，細羅為散。每服以煮赤小豆湯調下半錢，日三、四服。看兒大小加減服之。

《聖惠》治小兒水氣，面目腫，小便澀，心腹脹滿方。

赤茯苓 杏仁(湯浸去皮尖、雙仁，麩炒微黃) 漢防己 陳橘皮(湯浸去白瓢，焙) 紫蘇子(微炒) 甜葶藶(隔紙炒令紫色。各半兩)

上件藥搗，羅為末，煉蜜和丸如綠豆大。每服煎桑根白皮湯下十丸，日三服。五歲以下減丸服之。

《聖惠》治小兒水氣，通身腫滿，心腹妨悶，坐臥不安，宜服**甜葶藶丸方**

甜葶藶(隔紙炒令紫色) 牽牛子(微炒) 雄雀糞(各半兩) 大戟(一分) 膩粉(一錢，研入) 巴豆(十粒，去皮心，別紙裝，壓去油)

上件藥搗，羅為末，都研令勻，用棗瓢和丸如綠豆大。每服以溫茶下一丸，日二服。五歲以上加丸服之。

《聖惠》治小兒水氣，遍身腫滿，大小便難，喘促不得睡臥，宜服**甘遂散方**

甘遂(煨令微黃) 檳榔 川大黃(銼碎，微炒) 甜葶藶(隔紙炒令紫色。各一分) 牽牛子(半兩，微炒)

上件藥搗，細羅為散。每服以溫水調下一字，以利為效。隨兒大小以意加減。

《聖惠》治小兒水氣，四肢浮腫，腹脅妨悶，宜服**木香散方**

木香 赤茯苓(各一分) 牽牛子(三分，微炒) 鱉甲(塗醋炙令黃，去裙) 川大黃(銼碎，微炒。各半兩)

上件藥搗，細羅為散。每服以溫水調下半錢，以利為度。隨兒大小加減服之。

《聖惠》又方

檳榔(一分) 郁李仁(半兩，湯浸去皮，微炒)

上件藥搗，羅為末，以大麥面一兩和作餅子，灰火內煨熟。量兒大小與吃，即得通利氣下也，以溫水下之。

《聖惠》治小兒水氣，腹肚虛脹，頭面浮腫，小便不利。**郁李仁粥方**

粟米(一分) 郁李仁(湯浸去皮尖，微炒) 桑根白皮(銼。各一兩)

上件藥搗碎，每服半兩。以水一大盞，煎至七分，去滓，下米作粥，入少許生薑汁，任意食之。

《惠眼觀証》治水氣腫滿，黃膽。**中庸飲子方**

海金砂 續隨子(各一分) 生薑 中庸(樟柳根是也，各一兩) 蜜(二兩)

上五味細研，罨一宿，以次日五更時用絹帛濾汁，只作一服，溫暖吃盡，食前。逼下黃水，乃服勻氣藥補，後用樟柳根煮粥吃。

《聖惠》灸法：小兒水氣，四肢盡腫及腹大，灸臍上一寸，三壯，炷如小麥大，分水穴也。

## 中惡第四

《巢氏病源》小兒中惡候：小兒中惡者，是鬼邪之氣卒中於人也。無問大小，若陰陽順理，榮衛平調，神守強則邪不乾正。若精氣衰弱，則鬼毒惡氣中之。其狀先無他病，卒然心腹刺痛，悶亂欲死是也。凡中惡腹大而滿，脈緊大而浮者死，緊細而微者生。余勢不盡，停滯臟腑之間，更發後，變為疰也。

《葛氏肘後》救卒死，或先病痛，或常居寢臥奄忽而絕，皆是中惡，救之方。

上取蔥黃心刺其鼻，男左女右，入七、八寸。小兒量度之。若使目中血出佳。扁鵲法同。是後穴耳條中。葛言此雲刺鼻，故別為一法。

《葛氏肘後》又方

上令二人以衣壅口，吹其兩耳，極則易人。可以筒吹之，並捧其肩上，側身遠之，莫臨死人上。

《葛氏肘後》又方

上以蔥葉針耳、耳中、鼻中，血出者莫怪，無血難治，有血是候。時當捧兩手忽放之，須臾，死人自當舉手撈人，言痛乃止。又男刺左鼻，女刺右鼻中，令入七、八寸餘大效。小兒量度之。亦治自縊死。此與扁鵲方同。

《葛氏肘後》又方

上以綿漬好酒中，須臾置死人鼻中，手按令汁入鼻中，並持其手足，莫令驚。

《葛氏肘後》又方

上視其上唇裡弦有兒如黍米大，以針決去之。

《葛氏肘後》又方

上以小便灌其面，數回即能語，此扁鵲法。

《葛氏肘後》又方

上末皂莢如大豆，吹其兩鼻中，嚏則氣通矣。

《葛氏肘後》又方

上割雄雞頭取血，以塗其面，乾復塗，並以灰營死人二周。

《葛氏肘後》又方

上以管吹下部，令數人互吹之，氣通則活。

《葛氏肘後》又方

上破白犬以拓心上，無白犬小雞亦佳。

《葛氏肘後》又方

上取雄雞，就死人口斷其頭，以熱血瀝口中，並以竹筒吹其下部，極則易人，氣通下則火。

《葛氏肘後》又方

上取牛馬糞尚濕者，絞取汁，灌其口中令入喉。若口已噤者，以物強撥之。若不可強者，乃扣齒下。若無新者，以人溺解，乾者絞取汁。此扁鵲法。

《千金》治卒忤方。此病即今人所謂中惡者與卒死，鬼擊亦相類為治。皆參取而用之。

上鹽八合，以水三升煮取一升半，二服得吐即愈。《備急方》云：治鬼擊，若小便不通，筆頭七枚燒作灰末和服之，即通。

《外台》《古今錄驗》黃帝護命千金丸 療羸瘦歷年，胸滿結疹，飲食變吐，宿食不下，中風鬼疰疾瘦方。

野葛(七寸，炙) 斑蝥(二十枚去足、翅，熬) 雄黃 雌黃 丹砂(各研) 瓜丁 鬼臼 礬石(泥裹燒半日) 沙參 莽草(炙) 椒(去目汗。各一兩) 地膽(十五枚，去足、翅，熬)

上十二味搗、下篩，蜜和搗三十杵為丸如梧子大。服五丸，日二。卒中惡氣絕不知人，服如小豆二丸，老小半之。牛馬所抵踐癰腫，若蟲毒所嚙，取一丸，著掌中唾和，塗瘡中毒上，立愈。正月日，以酒率家中大小各一丸，一歲不病。若傷寒身熱，服一丸。若欲視病，服一丸。病者共臥不恐。忌生血物。

《聖惠》治小兒中惡，腹心堅脹，疼痛，顏色青黑，大便不通。桃奴散方

桃奴(五枚) 甘草(一分，炙微赤，銼) 麝香(一錢，細研) 杏仁(二十枚，湯浸去皮尖、雙仁，麩炒微黃) 桔梗(去蘆頭) 赤芍藥 黃芩 柴胡(去苗) 川升麻 川大黃(銼，微炒) 鬼臼(去毛。各半兩)

上件藥搗，粗羅為散。每服一錢，以水一小盞，煎至五分去滓，不計時候溫服，以利為度。量兒大小，以意加減。

《聖惠》治小兒中惡，心堅強，卒痛欲困。鬼箭羽散方

鬼箭羽 真珠(末，各一分) 羚羊角(屑) 桔梗(去蘆頭) 川朴硝 川升麻 赤芍藥 柴胡(去苗) 黃芩(各半兩) 桃仁(十枚，湯浸去皮尖、雙仁，麩炒微黃) 川大黃(一兩，銼，微炒)

上件藥搗，粗羅為散。每服一錢，以水一小盞，煎至五分去滓，不計時候溫服。量兒大小，以意加減。

《聖惠》治小兒中惡，心痛，辟除邪氣。雄黃丸方

雄黃(細研) 真珠(末。各半兩) 麝香 牛黃(各細研，一錢) 巴豆(二十枚，去皮心，研，紙裹壓出油) 上件藥都研令勻，入棗瓢及煉蜜和丸如粟米大。每服以薄荷湯下三丸。量兒大小加減服之。

《嬰孺》治小兒中惡，心腹堅強，卒痛欲困。鬼箭羽湯方

鬼箭羽(二分) 朱砂(一分) 羚羊角(屑) 桔梗 鬼臼 朴硝(湯成下。各四分) 升麻 芍藥 柴胡(各五分) 黃芩(六分) 大黃(八分) 桃仁(四十二個，碎，去皮尖)

上以水四升，煮一升二合。二歲兒為四分。更量兒大小與服之。

《葛氏肘後》灸法：以繩圍其死人肘腕，男左女右畢，伸繩從背上大椎度以下，又從此灸橫行各半繩，此法三灸各三即起，又令爪其病患人中，不醒不起者，卷其手，灸下文頭，隨年壯。又灸鼻中三壯也。又灸頤下宛宛中，名承漿穴，十壯，大效。又灸兩足大指、爪甲聚毛中七壯。此華佗法，一云三七壯。又灸臍中百壯也。



《巢氏病源》小兒卒死候：小兒卒死者，是三虛而遇賊風，故無病倉卒而死也。三虛者：乘年之衰一也，逢月之空二也，失時之和三也。有人因此三虛，複為賊風所傷。使陰氣偏竭於內，陽氣阻隔於外，而氣壅閉，陰陽不通，故暴絕而死也。若腑臟未竭，良久乃蘇，亦有兼挾鬼神氣者，皆須邪退乃生也。此中客忤及中惡，卒死而邪氣不盡，停滯心腹久乃發動，多變成疰也。

茅先生：卒死候，眼合齟齒，遍身如綿軟，面青黑，口鼻冷。此候因本生下而遍身熱，或因有驚患，醫人一向退熱，不曾下得驚積及奶積，遂積聚被邪氣至此候。

上前件三個候都來，一般只是要辨元初受惠根源。所治者，急下奪命散與吐下風涎，（方見急慢驚風門中）。醒後便下勻氣散（方見胃氣不和門中）二服補。除後，下朱砂膏、（方見驚積門中）。鎮心丸與服。（方見一切驚門中）。如有伏熱來時，即下大附子散，與調理三、五日安樂。（方見慢驚風門中。）前件三個形候，只是此一般調理。上件疾見鴉聲上啼、偏搐、汗如珠、不得睡、眼障淚出，死候不治。

《嬰童寶鑒》小兒三虛歌：

乘年之衰兮逢月之空，失時之和兮五虛之中。卒中賊風兮成卒死，兼挾鬼氣兮候亦同。臟腑未絕兮須再活，急令醫治兮莫忽忽

《金匱要略》救小兒卒死而吐利不知是何病方。

上以馬屎一團絞取汁灌之。無濕者，水煮，乾者取汁。

《葛氏肘後》救卒死而壯熱者。

上用礬石半斤，水一升半煮消，以漬腳，令沒踝。

《葛氏肘後》又方 救卒死而目閉者。

上用騎牛臨面搗薤汁，灌之耳中。

《葛氏肘後》又方 救卒死而四肢不收，屎便者。

上取牛洞一升，溫酒灌口中。洞者，稀糞也。

《千金》卒死，無脈、無他形候，陰陽俱竭故也。治之方。

上用牽牛臨鼻上二百息，牛舐必瘥。牛不肯舐，著鹽汁塗面上，即牛肯舐。

《千金》又方

上灸，熨斗熨兩脅下。（《備急方》云：及治尸厥。）

《千金》治魘死不自覺者方。

上用慎燈火，勿令人手動，牽牛臨其上即覺。若卒不能語，取東門上雞頭末之，以酒服。

《千金》治卒魘死方。

上搗韭汁灌鼻孔中。劇者灌兩耳（張仲景云：灌口中。）

《千金》治鬼魘不悟方。

上末伏龍肝吹鼻中。

《千金》又方

上末皂莢如大豆許，吹鼻中，嚏則氣通，起死人。（《集驗方》治中惡。）

《聖惠》治小兒卒死方。

上取女青末半錢，用牛乳汁調服之。

《聖惠》又方

上燒 豬糞，水解取汁服之。

《聖惠》又方

上以苦參醋煮汁少許，內口中即蘇。水煮亦得。又酒煮爛棺木板取汁，服少許。

《聖惠》又方

上煎鹽湯令極鹹，以物拗口開灌之，令入腹即活。

《聖惠》又方

上以熱湯和灰，濃壅身上，逡巡即蘇。

《嬰孺》治小兒不知所病便所絕方。

上取雄雞冠臨兒口上割血，滴入口下即活。

《葛氏肘後》灸法：卒死而四肢不收、屎便者，灸心下一寸、臍上三寸、臍下四寸各一百壯。兒小者隨年。

《千金》治卒死，針間使各百餘息。

《千金》灸鼻下人中。一名鬼客廳。（《肘後》方云：又治尸厥。）

## 鬼持第六

（鬼氣附）

《巢氏病源》小兒為鬼所持候：小兒神氣軟弱，精爽微羸，而神魂被鬼所持錄，其狀不覺有餘疾，直爾萎黃，多大啼喚，口氣常臭是也。

《嬰童寶鑒》小兒鬼持歌：

小兒氣弱命中衰，魂魄多應被鬼持。其候萎黃多哭地，不須用藥可求師。

《嬰童寶鑒》又小兒鬼氣歌：

鬼氣皮膚裡，相傳臟腑開。腫虛如水病，似驚癇。熱發渾身澀，心攣痛所攢。小兒還有此，服藥急醫看。

《圖經》治鬼持方。

上用虎睛、爪，並指、骨、毛以系小兒臂上，辟惡鬼。

《外台》：《深師》**五邪丸** 療邪狂鬼魅妄言，狂走恍惚不識人，此為鬼忤，當得殺鬼丸方。

丹砂 雄黃(各別研) 龍骨 馬目毒公 鬼箭(各五兩) 鬼臼(二兩) 赤小豆(三兩) 芫青(一枚) 桃仁(百枚，去皮尖，熬，別研)

上九味搗、下篩，細絹篩，和諸藥拌，令和調後內蠟和之，大如彈丸，絳囊盛之。系臂，男左女右，小兒系頭。合藥勿令婦人、雞犬見之，所服蜜和丸如梧子，一服三丸，日三。忌五辛、生血物。

## 疰病第七

《巢氏病源》小兒疰候：疰之言住也，謂其風邪鬼氣留人身內也。人無問大小，若血氣虛衰，則陰陽失守，風邪鬼氣因而客之，留住肌肉之間，連滯臟腑之內。或皮膚掣動，游易無常；或心腹刺痛；或體熱皮腫，沉滯至死。死又疰易旁人，故為疰也。小兒不能觸冒風邪，多因乳母解脫之時，不避溫涼暑濕，或抱持出入早晚，其神魂軟弱而為鬼氣所傷，故病也。

《千金》治小兒疰方。

上用灶中灰、鹽等分相和，熬，熨之。

《千金》**太一備急散** 主卒中惡、客忤、五尸入腹、鬼刺、鬼疰及中蠱疰吐血、下血及心腹卒痛，腹滿，傷寒，熱毒病六、七日方。

雄黃 芫花 桂心(各二兩) 丹砂 蜀椒(各一兩) 藜蘆 巴豆(各一分) 附子(五分，炮裂，去皮臍) 野葛(三分)

上九味，巴豆別治如脂，余合治下篩，以巴豆合和，更搗之，合和調以銅器中，密貯之，勿泄。有急候，水服一字七，可加至半錢七，老小半之。病在頭，當鼻衄；在膈上，吐；在膈下，利；在四肢，當汗出。此之所為如湯沃雪，手下皆愈。秘之，非醫不傳。

《千金》治疰病相染易，及霍亂中惡，小兒客忤，長病方。

獾肝(一具) 雄黃 莽草 丹砂 鬼臼 犀角 巴豆(各一兩) 麝香(二分) 大黃 牛黃(各一兩) 蜈蚣(一枚)

上十一味末之，蜜丸。空腹服如麻子大二丸，加至五丸，以知為度。

## 尸疰第八

《巢氏病源》小兒尸疰候：尸疰者，是五尸之中一尸疰也。人無問小大，腹內皆有尸蟲，尸蟲為性忌惡，多接引外邪，共為患害。小兒血氣衰弱者，精神亦羸，故尸疰因而為病。其狀沉嘿不的知病之處，或寒熱淋瀝，涉引歲月，遂至於死。死又疰易旁人，故名之為尸疰也。

張渙論：小兒亦有疰病，與大人所病無異，久後疰易旁人，傳染骨肉，如尸疰蠱毒之類是也。

《外台》張仲景治大人、小兒飛尸。**走馬湯方**

巴豆(去心皮, 熬) 杏仁(去皮尖, 各二枚)

上二味, 取綿纏, 槌令極碎, 投熱湯二合, 捻取白汁服之, 須臾瘥。未瘥, 更一服。老小量之。通療鬼擊有尸症者, 常蓄此藥用驗。忌野豬肉、蘆筍。《備急》同。

《聖惠》治小兒尸症, 心腹滿脹, 疼痛不可忍。**木香散方**

木香 鬼箭羽 桔梗(去蘆頭) 當歸(銼, 微炒) 紫蘇莖葉(各半兩) 檳榔(三分)

上件藥搗, 粗羅為散。每服一錢, 以水一小盞, 入生薑少許, 煎至五分去滓, 不計時候溫服。更量兒大小, 加減服之。

《聖惠》治小兒尸症, 及中惡諸病皆主之。**犀角散方**

犀角 川升麻 木香 檳榔 桑白皮(銼) 川大黃(銼碎, 微炒, 各半兩) 麝香(一錢, 細研) 桃仁(二錢七枚, 湯浸去皮尖、雙仁, 麩炒微黃)

上件藥搗, 細羅為散。每服以溫水調下半錢, 日四、五服。更量兒大小, 加減服之。

《聖惠》治小兒尸症鬼癖, 心腹往來疼痛。或加寒熱恍惚, 形色多般。**桃仁散方**

桃仁(三七枚, 湯浸去皮尖、雙仁, 麩炒微黃) 木香 人參(去蘆頭) 虎頭骨(塗酥炙令黃) 檳榔 京三稜(微煨, 銼) 白芥子(微炒) 麝香(細研) 桂心(各一分) 款冬花 朱砂(細研, 水飛過) 乾桃柳葉(各半兩)

上件藥搗, 細羅為散。不計時候, 以溫水調下半錢。量兒大小臨時加減。

《聖惠》治小兒尸症, 鬼癖驚癇, 魍魎三十六種, 無辜天行急黃。並宜服**保童丸方**

牛黃 麝香(各細研) 真珠(末) 甘草(炙微赤, 銼, 各一分) 赤芍藥 光明砂(細研, 水飛過) 赤茯苓 杏仁(湯浸去皮尖、雙仁, 麩炒微黃, 各半兩) 甘遂(七分, 煨令微黃) 虎睛(一對, 酒浸, 炙令微黃) 巴豆(五枚, 去皮心研, 紙裏壓出油)

上件藥搗, 羅為末, 都研令勻, 煉蜜和丸如麻子大。三、四歲兒, 每服以荊芥湯下二丸。更量兒大小加減服之。

《聖惠》治小兒尸症, 及諸蟲魅。精氣入心腹, 使兒刺痛, 黃瘦。**雌黃丸方**

雌黃 雄黃 朱砂(各細研) 川大黃(銼碎, 微炒) 白頭翁 徐長卿 羚羊角(屑, 各一分) 麝香(細研, 半分)

上件藥搗, 羅為末, 都研令勻, 以青羊脂和丸如麻子大。每服以粥飲下三丸, 日三服。更量兒大小加減服之。

《聖惠》治小兒尸症, 邪氣入腹, 痛。**立效方**

雄黃(一分, 細研) 梔子仁(十枚) 赤芍藥(半兩)

上件藥搗, 細羅為散, 研入雄黃令勻。每服以溫水調下半錢。更量兒大小加減服之。

《聖惠》治小兒尸症, 勞瘦, 或時寒熱。**鬼臼丸方**

鬼臼(半兩, 去毛) 川升麻(三分) 麝香(一錢, 細研) 柴胡(一兩, 去苗)

上件藥搗, 羅為末, 都研令勻, 煉蜜和丸如綠豆大。每服以暖酒下十丸, 日三服。更量兒大小加減服之。

《聖惠》又方

上以桃仁二十枚, 湯浸去皮尖, 生研, 用水一中盞煎至五分, 去滓。量兒大小, 分減與服, 當吐為效。如不吐, 即非是疰也。

《聖惠》又方

上用鱉頭一枚, 燒為灰, 細研為散。每服以新汲水調下半錢。

《聖惠》又方

上以雞子一枚打破, 生吞之。已困者內入喉中, 搖頭令下即瘥。

張渙 雌黃丹方 治尸疰病。

雌黃 雄黃(各細研) 川大黃(慢火炮黑) 鬼臼(去毛, 各一兩) 桃仁(三十個, 湯浸去皮尖, 研) 白頭翁(半兩, 以上並為細末, 次用) 麝香(一分, 別研) 巴豆(十粒, 去皮心膜, 紙裹出油)

上件都研勻, 以羊脂五兩熔和諸藥成膏, 如黍米大。每服三粒至五粒, 荊芥湯冷下。量兒大小加減。

張渙又方立效方

川大黃(炮, 銼) 乾桃柳葉(洗, 焙乾。各一兩) 梔子仁 赤芍藥(各半兩)

以上搗羅為細末, 次用: 朱砂(細研, 水飛, 一兩) 麝香 雄黃(各研一分)

上件都拌勻, 每服一錢, 用蜜湯調下。量兒大小加減。

## 蟲疰第九

《巢氏病源》小兒蟲疰候: 人聚蟲蛇雜類, 以器皿盛之, 令相啖食, 余一存者, 即名為蠱。能變化或隨飲食入腹, 食人五臟。小兒有中者, 病狀與大人、老子無異, 則心腹刺痛、懊悶。急者即死。緩者涉歷歲月, 漸深羸困。食心臟盡利血, 心臟爛乃至死。死又疰易旁人, 故為蠱疰也。

《外台》: 范汪療大人、小兒蟲疰百病, 瘕積聚, 酸削骨肉, 大小便不利, 卒忤, 遇惡風臃脹腹滿, 淋水轉相注, 殫門盡戶, 延及男女外孫, 醫所不能療, 更生十七物紫參丸方

紫參 人參 半夏(洗) 藜蘆 代赭 桔梗 白薇 肉蓯蓉(各三分) 石膏 大黃 牡蠣(熬) 丹參(各一分) 蝦蟆(灰) 烏頭(炮。各四分) 野狼毒(七分) 附子(炮, 三分) 巴豆(七十枚, 去心皮, 熬)

上件藥搗、篩, 蜜和為丸, 以飲下如小豆一丸, 日三服。老小以意減之。蜂蠶所螫, 以塗其上, 神神。忌豬羊肉、冷水。一方無蝦蟆, 有乾薑四分。

《聖惠》治小兒中蠱毒, 腹中堅如石, 面目青黃, 小便淋瀝, 變易無常。羊角散方

羊角(脣) 荷(各一兩) 梔子仁(七枚) 赤芍藥 牡丹 黃連(去鬚。各一兩) 犀角(脣, 半兩)  
上件藥搗, 粗羅為散。每服一錢, 以水一小盞, 煎至五分, 去滓溫服, 日三、四服。更量兒大小加減服之。

《聖惠》又方

敗鼓皮(三分, 炙令黃) 苦參(銼) 荷根(各一兩)  
上件藥搗, 粗羅為散。每服一錢, 以水一小盞, 煎至五分, 去滓溫服, 日三、四服。更量兒大小加減服之。

《聖惠》治小兒國中蠱毒, 宜服升麻散方

川升麻 桔梗(去蘆頭) 栝蒌根(各半兩)  
上件藥搗, 粗羅為散。每服一錢, 以水一小盞, 煎至五分, 去滓溫服, 日四、五服。量兒大小加減服之。

《聖惠》治小兒飛蠱, 狀如鬼氣者, 宜服雄黃散方

雄黃 麝香(各細研) 犀角(末, 各半兩)  
上件藥都研令勻, 每服以溫水調下半錢, 日四、五服。更量兒大小加減服之。

《聖惠》治小兒五種蠱毒, 悉主之方。

上搗馬兜苓根, 細羅為散。每服一錢, 以水一小盞, 煎至五分, 去滓, 空腹頓服。當時隨吐蠱出, 未快吐, 即再服。

《聖惠》又方

上用敗鼓皮一片, 燒為灰, 細研為粉。空心以粥飲調服一錢。病患須與當呼蠱三姓名, 病便愈。

《聖惠》又方

上用薺 一兩, 搗羅為末, 以粥飲調下一錢, 甚效。量兒大小加減服之。

《聖惠》治小兒畏忌, 中蠱欲死方。

上用甘草半兩, 生銼, 以水一中盞, 煎至五分, 去滓, 分為二服, 當吐蠱出。若平生預防蠱者, 宜熟炙甘草, 煮汁服之, 即內消不吐, 神效。

《聖惠》治小兒中蠱毒, 令腹內堅痛, 面目青黃, 淋露骨立, 病變無常方。

上用桃株、寄生二兩搗, 細羅為散, 如茶點服之, 日四、五服。

《聖惠》又方

上用麝香半錢, 細研, 空腹以溫水調服, 即吐出蠱毒, 未效再服。

《聖惠》治小兒中蠱, 下血欲死方。

上取生赤雌雞翅下血, 服之立效。

《聖惠》又方

上搗青藍汁，頻頻與半合服。

《聖惠》治小兒疰病、諸蟲魅，精氣入心入腹，刺痛，黃瘦骨立。雄黃丸方

雄黃 雌黃(各四分) 丹砂 野丈人 徐長卿(各三分) 大黃(五分) 麝香(三棗大) 羚羊角(屑，五分)  
上為末，以青羊脂和丸。百日兒酒服黍米大三丸，日進二服，或豆大亦可。

張渙 雄麝散方 專治蠱毒病。

雄黃(水磨者細研) 麝香(別研) 羊角(屑) 赤芍藥 敗鼓皮(炙黃。各一兩) 馬兜鈴根 薺 鬼臼(去毛。  
各半兩，以上除雄黃、麝香外搗，羅為細末)  
上件八味都一處拌勻，研細，每服半錢。濃煎甘草湯調下，食前。

張渙又方麝犀湯

犀角(屑) 鬼箭 安息香 水磨雄黃(細研，各一兩) 苦參 牡丹皮(各半兩)  
以上搗，羅為細末。次用：麝香(半兩，細研)  
上件都拌勻，每服一錢，水一大盞，煎至五分，去滓放溫，時時服。